



Mir (f)liege wyter....!

Vor zymmlich gnau dreihundert Joore
 isch e bsunderi Figuur geboore,
 vo däm kunnt die bekannti Mär
 är flieg' uffere Kuugele drhär.
 So und ähnlig Unglaublichs losst är uuse,
 s'sinn d'Luugigschichte vom Baron vo Minchhuuse.
 Gnau wie dä Baron uff synere Kuugele
 isch vor zwelf Joor z Basel au ain go z ruugele,
 hett ys au allerhand Gschichtli versproche
 und denn au allerhand verbroche.
 Jetzt bruucht er nimm z grinse und au nimm z liege
 dä Wessels leen mer gärn wytterfliege...
 Liege und dervoo denn z'fliege
 das hämmir welle zämmegriege.
 Mer wänn s bescht Klima – und mer liege
 und zwoor nit numme grad bym Fliege –
 bruuche mer Strom, denn dien mir ys nie begniege
 Energie gitts jo immer, kasch dryber verfliege.
 Scho mit däm Satz duet me sich beliege
 und en als Wooret aanebiege,
 sygs Supertechnik in dr Woonig,
 sygs die dääglicg Elektronik,
 während mer dr Umwält schaade
 dien mer unser Händy laade
 und in de Ressource baade.
 Dass ys die jetz langsam fääle
 duet zwoor zue Diskussioone quääle,
 wenn's aber um uns sälber goot
 schleen mer dä Gedangge z'dood.
 Die greeschten Auti dien mer kaufe,
 im Stau leen mer d Motore laufe
 und flueche denne, läng mers Gweer
 «lueg emool dä Schissverkeer!»
 Aber mer wisse – und dasch nit glooge –
 um Basel mache scho vyyl e Booge.
 Au Firme hänn scho Fäade zooge,
 d Regierig duet das nit so blooge,
 das miesst me zerscht no hinterfrooge.
 Was usekunnt, das isch extrem
 und die Luug hett scho System:
 Me säch z Basel gar kai Verkeersprobleem,
 aber jedi Baustell – s hett kai Zwägg
 nimmt aim dr letscht Parkblatz ewägg.
 Kasch nimm yynen und nimm uuse goo
 und wenn'de dinneblybsch, blybsch aifach doo,
 do wärs am beschte, wytter z'liege
 und mitere Droone usezfliege.
 In dr Stadt herrscht aber d Mainig,
 grien und rot sinn sich doo ainig,
 muesch numme mit em Velo goo,
 denn hesch gnueg fyr d Umwält doo.
 Nur vergässe Vitelli und Hampe,
 dass e Velofaarer wo kuum mee muess drampe,
 lengscht nimme läbt vo dr Luft im Schluuch,
 sondern au vom Energieverbruuch.
 Will's dangg E-Bike und E-Trottinett
 kai anders Bicyclette mee hett.
 Vom Staat griegsch so Göppel ganz e Huffe
 fascht gratis – mer wärde no dra versuffe.

Zrugg zue den Auti – s wird z Basel gwettet –
sinn die e moll duss, denn isch s Klima grettet.
Jä heert denn fyr die – de wirsch grad muff –
d Umwält ganz aifach am Stadtrand uff?
Im Gedangge, fyr alli ebbis z mache
blaant me, wie dr Minchhuse, au so komischi Sache
und glaubt sogar, s'syg nit fyr d Katz
Biodiesel gwinn me uss Kaffisatz.
Aber alles blybt glyych – es isch jo schytter –
mer verspritze Sprit none mängge Liter.
Faare und fliege au freelig wytter
und jede Fryttig deents an Demonstratioone,
dass me Natur und Klima immer will schoone.
Fyr d Schieler duet sich das au loone,
sy mien nit in d Schuel und kenne floone,
aber e Stigg vo dr Zuekumft, die haig me ne gstoole,
drum miess me die jetz scho yynehoole..
Do wird d Wooret vyllicht e bitzli verzooge,
aber wenn's ums gross Gäld goot, wird richtig glooge.
Zerscht wird vyl versproche und s heegschti Salär bezooge
und hett me denn nyt Gschiids aanebooge,
hett sich dr Big Boss schnäll verzooge
und isch denn, währenddäm me s Personal duet blooge,
scho miteme goldige Fallschirm wytergflooge.
Zwai Bischbill nämme mer au no zämme
wo sich im Grund gno sotte schämme.
Dass d Bangge scho n e Zyttlang liege
hesch als Kund immer wieder mit kenne kriege.
Spaare muess me nimm, de griegsch jo nyt zrugg
und mit Speese mache' s der au no Drugg.
Uff de Dächer pfyffes scho lengschtens d Spatze,
leeg s Gäld - wie friehner - under d'Matratze.
Jo, und denn no, was d Wärbig duet verspräche
und by dr erschte Gläagehait bräche.
Mit lange Beschriibige wirsch degglet
und wenn sy gnau befolgsch, bisch maischtens verseggled,
kaufsch online, griegsch e grosses Pagg
und isch's nit s Richtig, kaufsch d Katz im Sagg.
Jetzt no zum Fliege – do wirsch jo wisse,
das derf zwoor s Militär mit guetem Gwisse,
aber d Luftwaffe die dryfft s falschi Ziel,
statt Langebrugg fliegt me nach Mümliswil.
Zuegää, hitte wurd's aim gruuse,
wenn ain so liegt, wie dä Minchhuse.
Aber bassed uff und seen-d Eych vor,
nit ganz richtig – isch au nit woor....
Laider dien sich immer mee dra halte
und sinn efang stargg im Werter spalte,
dr bescht Spruch zue däm Thema isch doch bis dato:
„Se non e vero, e ben trovato“.
Diräggd glooge wird sälte nach unsrem Empfinde,
wie's denn gmaint isch muesch sälber uusefinde.
Aber dreyhundert Joor nach däm Heer Baron
d'Wooret hitt noni z'kenne, das wär doch e Hoon.
Weniger fliege isch sicher nit schlächt
und e glainere Kaare sicher au rächt
drum sotte mer mindischtens do am Rhy
jede Daag e bitz umwätbewusster sy.
Isch jede au im Glaine derby
no isch d Zytt fyr alles noni so knapp
und s haut no nit alles – d Schissgass durab!

D Ladäärne-Uusstellig uff em Minschterplatz und d Waage-
und Reggwisyte-Uusstellig bi dr Kasäärne sin vom Määntignacht
bis am Mittwuch demoorge! Deert und an de 3 Verkaufsständ
(CINS) in dr Stadt ka men au alli Zeedel und Schnitzelbängg,
d Blaggedde und dr Rädäbäng kaufe.

Queryystyyger bi de Querschleeger jederzyt willkomme!

www.querschleeger.ch